

Bigoscht meh als alles

Autor(en): **Straub, Esther**

Objektyp: **Article**

Zeitschrift: **Neue Wege : Beiträge zu Religion und Sozialismus**

Band (Jahr): **112 (2018)**

Heft 10

PDF erstellt am: **22.02.2023**

Persistenter Link: <http://doi.org/10.5169/seals-816590>

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern. Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden. Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Bigoscht meh als alles

Esther Straub

Slam heisst jo eigetli zueschloh, und de Jesus, de het uf em Berg obe prediget: «Wenn di öppert uf die eint Bagge haut, gib em Glegeheit, au no uf die ander z schloh.» Die erscht Slam-Predigt sozäge.

Chürzlech hett ich tatsächlech fascht zuegschlage, wo mi öppert gfroget hät, wieni au alles under ein Huet brächi. Wenn mi öppis aapisst im Läbe, denn isch es die Frog.

Früener hani si beantwortet, ha erchlärt, wie vil Prozent das i wo wenn schaffe, und denn alles zämezellt und gmerkt, dass da gar nöd interessiert. «Du bisch jo au no Muetter», händs amel gsait. Und denkt händs «und Husfrau». Und welle wüsse händs, wies bi üs dihei usgseht.

Und drum hani denn gar nüt meh gsait und d Fuscht im Sack macht. Aber hüt bhalt i si nöd im Sack, sondern slamme.

Natürlech gsehts furchtbar us dihei.

Do chunsch hei und no vor de Wohnigstür bücksch di s erscht mol, zum e Jagge uflöse und ad Garderobe hänke.

Und wens denn ohni Stürchle übers Schuemosaik iegschafft häsch, stohsch im Gang, und vor dir ligged Turnsäck am Bode und Schwümmesäck mit füechte Tüechli drin und Badhose – und zwüsched ine Paninibildli. Du bücksch di und henksch, wa nass isch, zum Tröchne is Badzimmer. Döt liit hinder de Türe e Bürschte, zwo lääri WC-Papierrolle warted uf d Kartonsammlig, und e ganzes Biigeli Paninibildli isch i d Badwane ine grutschet. Und du bücksch di.

Ide Chuchi chasch uf de Bröös-meli vom Zmore schliifschüenle:

Du nimmsch Schüfeli und Wüschlerli und bücksch di.

Wötsch churz i de Stube anesitze, ligged vor em Kanape verchrügeti Söcke, Hoorgümmeli, en leere Guetzlipack und Paninibildli, überall Paninibildli, und du bücksch di wider und wider.

Bi de Bildli überleisch churz, öbds nöd gschider gad furt rüersch, aber denn häsch Verbarme – und bis zur WM lisisch di gliiche Bildli nomol uf und nomol und nomol und nomol – und so gohsh nuno bückt durs Läbe.

De Jesus, de het e Frau mit eme verchrümmte Rugghe gheilt. Er het ere d Händ ufgleit und si het sich ufrichtet.

Und de Jesus, de het uf em Berg obe prediget, mer sölled ufluege, zu de Vögel, wo nöd saied und nöd ernted und nöd i Schüüre sammled – und glich ernährt si de Vater im Himmel – oder mis Kompostchübeli ufem Fenschtersims. Allpot gönd d Spatze und d Agerschte dra und zupfed use, wan ine passt. Und im Hof une liit denn de Rescht: Eierchale, Öpfelbitzgi, Rhabarberschelfere, Ebbeerflüüge – und ich bück mi.

D Schwerchraft hebet üs am Bode und loht üs nöd in Himmel schtiige, und d Schwerchraft isch gschuld, dass i mi ständig mo bücke.

De Jesus het i Glichnis verzellt, wie Gott gege d Schwerchraft akämpft. Anere Husfrau, wo zäh Drachme het, isch eini devo abegfalle und devogruget. Si bückt sich, chehrt s ganz Hus zunderobsi und suecht so lang, bis si die verlorni Drachme gfunde het, und denn macht si mit allne Nochberinne und Fründinne e grosses Fescht.

Au Gott het sich bückt, tüf aben i d Welt, well mir s verbocked hend mit dere Welt.

Agfange hets im Paradies, wo d Eva und de Adam zum Schluss cho sind, dass da, wa do im Paradies sig, nöd alles chöng sii – und meh hends übercho: I d Welt use het Gott si gschickt zum Schaffe und zum under Schmerze Gebäre – und us Fäll het Gott ine Röck gemacht, dass nöd früred.

Und denn het de Kain de Abel erschlage, iifersüchtig isch er gsi, well dem meh grote isch als ihm. Und Gott het de Kain furtgschickt

– und em zum Schutz e Zeiche gmacht.

Und denn hend d Mensche ganz wild tue. Und Gott het e Fluet gschickt: Furt mit dere Welt! Und glich het Gott s Lebe dur d Fluet dure grettet – aber besser wore isch es nocher nöd – mit de Welt und de Lüt.

Nu Gott, Gott het etz gseh, dass es so isch, dass d Schwerchraft de Mensch am Bode hebet und nöd in Himmel loht schtige.

Und so het Gott sich bückt – abebückt noch dem, wan üs abegeheit und wan üs abverheit – wie ne Husfrau het si sich bückt, und ihren Rugghe hät sich gchrümmt.

Do dra moni amel tänke, bim Söcke uflöse und Paninibildli isammle – und denn denki, da sind Söcke und Turnsäck und Hoorgümmeli – aber s isch no anders am Bode uf dere Welt, und drum hät Gott en chrümme Rugghe.

Und wenn i mi denn ufrichte und d Ruggewirbel wider überenand z lige chömed wie d Paninibildli im Biigeli uf miner Hand, denn gsehnis vormer, um wa dass goht im Lebe, bim Pfarrere, Predige und Politisiere: Gott de Rugghe z stärke.

So bringi denn ebe alles under ein Huet. Es isch letschtlich e Frog vo de Gymnastik – und vom Glaube, dass da, wo isch und am Bode isch, bigoscht meh als alles isch. ●

○ Esther Straub, *1970, Pfarrerin in Zürich Saatlen und Schwamdingen, ist Kirchenrätin der Evang.-Reformierten Landeskirche des Kantons Zürich. Sie ist Kantonsrätin der SP und Co-Präsidentin der *Neuen Wege*.
esther.straub@zh.ref.ch

○ Am 8. Juni feierte der Zürcher Pfarrverein im Kosmos in Zürich sein 250jähriges Bestehen. Unter dem Titel *Weil das, was ist, nicht alles ist!* ging ein Predigtslam über die Bühne. Esther Straub holte sich als Siegerin die Flasche Whisky.